



UPA 2019/109

30/4-2019

Justus Hansen

Tamanut ammasumik tusarniaanerni ammanerunissap qulakkeerneqarnissaanik Naalackersuisut peqquneqarnissaannik Inatsisartuni aalajangiiffigisassatut siunnersuut. Minnerpaamik tusarniaanernut najoqqutassanik tamanit pissarsisinaanisssaat qulakkeerneqassaaq.

(Inatsisartunut ilaasortaq Múte Bourup Egede, Inuit Ataqtigiit)

(Siullermeerneqarnera)

Demokraatini paasivarput, kikkut tamaat tusarniaanermut atatillugu akissuteqarnissaminnut periarfissaqarluartut inatsisissatut siunnersuutinut Naalackersuisuneersunut. Kattuffiit susasaqartunut siunnersuutit toqqaannartumik nassiuqqartarput aamma Naalackersuisut nittartagaanni siunnersuutit tusarniutigineqartut kikkugaluartuniilluunniit alakkarterisinnaapput.

Taanaattumik isumaqarpunga eqqunngitsoq, siunnersuuteqartoq oqarmat tamanut ammasumik tusarniaanerit ammasumik ingerlanneqarneq ajortut.

Siunnersuuteqartup siunnersuummini ajornartorsiutaasut tikkuarpaa, tusarniaanermut malittarisassat kikkunnit tamanit takuneqarsinnaanngitsut. Demokraatini akornutissaqartinngilarput malittarisassat kikkunnut tamanut saqqummiunneqassagaluarpata aamma Naalackersuisut kaammattorusuppagut tamanna isumageqqullugu, taamaakkaluartorli isumaqarpugut suliat tusarniaassutigineqartut tamanut ammasumik ingerlanneqartarnerat naliginnaasumik isornartoqanngitsoq.

Taamatut paasinnilluta siunnersuut suliareqqitassanngorlugu Inatsisinut Ataatsimiititaliamut innersuupparput.